



## INATSISARTUNI

Partii Inuit  
Randi Broberg

UPA 2014/18-1  
8.4.2014

**Pillugu kaammattuut: Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalakkersuisunut kaammattuutigaa nunani avannarlerni killerni innuttaasut akornanni arnat ikiliartornerannik ajornartorsiut pillugu nassuiaasioqqullugit. Sammisaaq tamanna pillugu ilisimatuutut allaatigisani, ilisimatusarnermi isumaliutissiissutini misissuinernilu inerniliinerit nassuiaammi eqiterneqassapput aammalu arnat Nunani Avannarli Killerni pitsaanagerusumik atugaqalernissaannut peqataaqataasinnaasunut suliniutinut siunnersuutinik imaqassalluni.**

(Aallartitat siulittaasuat Lars-Emil Johansen)

Partii Inuit maluginiarparput, Nunat Avannarliit Killiit Siunnersuisoqatigiiffiata kaammattuutigigaa, nunat pineqartut arnartaasa ikiliartornerat pillugu nassuiaasiortoqarnissaa, aammalu nunani pineqartuni arnat atugaasa pitsaanagerulernissaat siunertaralugu suliniutaasinnaasunik innersuussuteqartoqarnissaa.

Partii Inuit kaammattuut iluatigalugu, tamakkiisumik taperserparput, kaammattuummullu atasumik imaattunik tikkuagaqarusulluta:

Naalakkersuisuniit innersuussutigineqarpoq, suleqatigiissitaaq nassuiaasiortussaaq immikkut ilisimasalinnik inuttaligaasoq pilersinneqassasoq.

Tassani Partii Inuit pingaartipparput, immikkut ilisimasallit nassuiaasiornermi sapinggisamik tamakkiisumik isiginnillutik suleriuseqarnissaat.

Tamanna ilaatigut isumaqarpoq, ilisimasatigut katersat illuinnaasiunngitsumik ujartuiffigineqarnissaat, taamalu pissutsinik pioreersunik apeqqusiisinnaaneq qitiulluni.

Taamatuttaaq tamakkiisumik isiginnittumik misissueriaaseqarneq isumaqarpoq, qallikkut atukkat kisiisa pinnagit, aamma ilukkat atukkat qulaajaavigineqarnissaat.

Kiisalu Partii Inuit pingaartissavarput, suleqatigiissitassap qulaajaanissaminut suliakkiutip toqqammavissaa erseqqissunik oqaasertalerneqarumaartoq.

Allatut oqaatigalugu Partii Inuit isumaqarpugut qulaani taasagut qitiusuusut, suleqatigiissitassap innersuussutaasa qanoq atorsinnaatiginissaannut.

Partii Inuit taama oqaaseqaateqarluta, kaammattuutip suliatut ingerlateqqinneqarnissaa soqutigalugu akuersaarparput.